



**RESOLUCIÓN REITORAL DO 8 FEBREIRO DE
2010 DA UNIVERSIDADE DE VIGO POLA QUE
SE ABRE A CONVOCATORIA DE BOLSAS
ERASMUS PARA O CURSO 2010-11**

A Universidade de Vigo, como institución elixible para participar no programa Erasmus, asinou acordos bilaterais de intercambio de estudantes con outras institucións de ensino superior elixibles para participar neste programa durante o curso 2010-11, co obxectivo de mellorar a calidade do ensino superior e potenciar a dimensión europea, fomentado a cooperación transnacional entre universidades, estimulando a mobilidade europea e mellorando a transparencia e o recoñecemento académico de estudos.

En virtude destes acordos, esta Reitoría

RESOLVE

Publicar a convocatoria de bolsas ERASMUS para o curso 2010-11 destinadas a estudantes da Universidade de Vigo que estean cursando estudos conducentes á obtención de títulos oficiais co fin de realizar estudos en diferentes universidades europeas coas que a Universidade de Vigo ten establecido Acordo Bilateral no marco do Programa de Aprendizaxe Permanente.

BASES DA CONVOCATORIA

1.- Requisitos dos/as solicitantes

1.1.- Requisitos xerais

Os requisitos xerais para todos os/as estudantes da Universidade de Vigo son os seguintes:

- O/A estudante deberá estar matriculado/a no curso 2009-10 na Universidade de Vigo. O/A estudante deberá matricularse na Universidade de Vigo no curso no que se realizará a estadía (2010-11), como mínimo no segundo curso de carreira, estar a realizar o proxecto fin de carreira ou ser estudante de terceiro ciclo.
- Ter un nivel de coñecemento do idioma esixido para o país de destino que lle permita desenvolver a actividade académica que vai realizar.
- Non ter sido beneficiario/a dunha bolsa Erasmus con anterioridade.
- Ser cidadá/n dalgún dos 27 países membros da UE, de Islandia, Liechtenstein e Noruega, ou dun país candidato á adhesión ou posuír o estatuto de residente permanente, de apátrida ou de refuxiado/a en

España. Poderán participar aquelas persoas que, non sendo nacionais dun dos países participantes no PAP, o sexan de terceiros países e estean en posesión dun permiso de residencia válido para residir en España durante o período de realización da mobilidade.

1.2.- Requisitos específicos para cada praza

Os criterios específicos de selección de cada centro da Universidade de Vigo deberán facerse públicos en cada un dos centros antes da selección dos/as estudantes e serán enviados á Oficina de Relacións Internacionais (ORI) polos/as responsables de relacións internacionais de cada centro.

Os requisitos específicos para cada unha das prazas aparecen detallados na relación de prazas ofrecidas (ver anexo II).

2.- Duración do intercambio

A duración das bolsas non será inferior a tres meses nin superior a un curso académico (10 meses). A duración de cada praza vén establecida nos anexos.

3- Financiamento

3.1.- Axuda Erasmus

É unha axuda financiada pola Unión Europea co obxecto de sufragar os gastos adicionais por estudar nunha universidade estranxeira. Non ten como finalidade cubrir a totalidade dos gastos dos estudos no estranxeiro.

A contía da bolsa Erasmus será fixada pola Universidade de Vigo tras a notificación por parte do Organismo Autónomo de Programas Educativos Europeos (OAPEE) dos criterios de adxudicación de bolsas para o curso 2010-11. A título informativo, a bolsa media do curso 2009-10 é de 130 euros por mes de estada.

A Universidade de Vigo consignou 700.000 euros na partida orzamentaria ORI1211DERA492 para financiar as bolsas Erasmus.

3.2.- Axuda complementaria da Universidade de Vigo

A Universidade de Vigo consignou 70.000 euros na partida orzamentaria ORI1211DERA492. Estes fondos están destinados a outorgar unha axuda complementaria aos/ás bolseiros/as Erasmus, de estudos e de prácticas, que gocen dunha bolsa Erasmus durante o curso 2010-11.

Os/As bolseiros/as percibirán una axuda económica única máxima de 100 euros.

3.3.- Outras axudas complementarias

3.3.1.- Cursos Erasmus Intensive Language Courses (Cursos EILC)

O/A estudante seleccionado/a poderá solicitar unha bolsa para asistir a un curso de lingua intensivo antes de iniciar o seu período de estudos no estranxeiro.

A ORI deberá recibir as solicitudes no momento no que Axencia Nacional Erasmus indique, e desde a ORI serán enviadas ás institucións organizadoras.

O/A estudante non pagará taxas de matrícula no curso e recibirá unha bolsa adicional de 225 euros, contía que deberá ser confirmada polo OAPEE.

3.3.2.- Axuda complementaria do Ministerio de Educación

O Ministerio de Educación poderá conceder axudas complementarias aos/ás bolseiros/as Erasmus. A ORI informará aos/ás estudantes sobre os criterios de adxudicación que serán determinados polo Ministerio.

3.3.3.- Axuda complementaria do Xunta de Galicia

A Xunta de Galicia poderá conceder axudas complementarias aos/ás bolseiros/as Erasmus. No caso de que a Xunta dote orzamentariamente este programa, a ORI informará aos/ás estudantes sobre a convocatoria.

3.3.4.- Axuda complementaria da Deputación de Ourense

Os/As bolseiros/as Erasmus matriculados/as en centros do campus de Ourense poderán recibir unha axuda complementaria da Excelentísima Deputación Provincial de Ourense segundo os criterios establecidos pola dita institución.

4- Solicitudes e documentación

O formulario de solicitude atoparase na páxina web da ORI: <http://www.uvigo.es/ori>. O/A solicitante deberá encher o formulario. Unha vez finalizado o proceso deberá imprimir dúas copias que se presentarán coa seguinte documentación:

- Fotocopia do DNI.
- Dúas fotografías tamaño carné pegadas nos formularios de solicitude, unha en cada exemplar.
- O/As estudantes de Belas Artes deberán presentar un proxecto artístico.
- Os/As estudantes da ETSE Industrial deberán presentar un escrito do/a(s) responsable(s) do(s) destino(s) que solicitan confirmando a idoneidade do/a candidato/a para o destino elixido.
- Certificacións de coñecementos de idiomas segundo o punto 5 desta convocatoria.

O coñecemento do idioma empregado como lingua de ensino na universidade de destino valorarase no proceso de selección dos/as estudantes. Os coñecementos previos poderán acreditarse mediante a presentación das seguintes certificacións (niveis mínimos):

5.- Coñecemento de idiomas

O coñecemento do idioma empregado como lingua de ensino na universidade de destino valorarase no proceso de selección dos/as estudantes. Os coñecementos previos poderán acreditarse mediante a presentación das seguintes certificacións (niveis mínimos):

Inglés:
Marco Común Europeo de Referencia: nivel B2 (nivel avanzado da EOI)
Cambridge First Certificate
ALTE: nivel 3
3º curso aprobado na EOI
Curso Diplomado Maestro, lingua estranxeira inglés
Trinity: nivel 9
TOEFL: nivel medio - mínimo 50% - en calquera modalidade
IELTS: nivel 5.0
CERTICAP: nivel 60-74
Pitman en ESOL: nivel intermedio
City & Guilds en ESOL: nivel "Communicator"
CELS: nivel "Vantage" en todas as destrezas

Alemán:
3º curso aprobado na EOI
Goethe Institut Zertifikat

Francés:
3º curso aprobado na EOI
TCF: nivel 2 (Test de Connaissance du Français)
DELF B1

Os/As estudantes que non presenten ningunha destas certificacións deberán realizar as probas de idioma (inglés, alemán e/ou francés) que serán organizadas pola ORI en colaboración co Centro de Linguas da Universidade de Vigo.

A data de realización das probas escritas terá lugar o día 9 de marzo de 2010. Anunciaranse na páxina web da ORI e por correo electrónico. O día 10 de marzo de 2010 poderán realizarse probas orais, se é necesario e non se puideron realizar o día 9.

Os/As estudantes da Escola Universitaria de Estudos Empresariais realizarán as probas no seu centro o día 8 de marzo (inglés) e o 11 de marzo (alemán e/ou francés). As horas de realización das probas serán anunciadas na Escola Universitaria de Estudos Empresariais.

Están exentos de realizar estas probas:

- Os/As estudantes que só soliciten destinos nos que non sexa preciso o coñecemento destas linguas (inglés, francés ou alemán). Valorarase a presentación de coñecementos destes outros idiomas.
- Os/as estudantes das seguintes Escolas ou Facultades:

Ourense:

- Facultade de Ciencias

- Facultade de Historia
- Pontevedra:
- E.U. Fisioterapia
- Vigo:
- E.T.S. Enxeñaría Industrial (agás destinos que precisan xustificar coñecementos como aparece na relación de prazas).
 - Facultade de Filoloxía e Tradución.

6- Sesións de información

A ORI, en colaboración cos responsables de Relacións Internacionais dos centros da Universidade de Vigo, organizará sesións de información sobre a convocatoria que terán lugar os días que se citan, por campus e centros:

- 18 de febreiro de 2010:

Para o estudantado do Campus de Pontevedra, na Escola de Fisioterapia, no Salón de Actos, ás 09:00 horas

Para o estudantado dos centros de Vigo, cidade: o estudantado da Escola Universitaria de Estudos Empresariais, da Escola Universitaria de Enxeñaría Técnica Industrial e da Escola Universitaria de Enfermaría POVISA, no Salón de Actos da Escola Universitaria de Estudos Empresariais, ás 12:30 horas.

- 19 de febreiro de 2010:

Para o estudantado da E.T.S.E. Industriais, E.T.S.E. de Telecomunicación e a E.T.S.E. de Minas. No Salón de Actos. E.T.S.E. Telecomunicacións ás 09:00 horas.

Para o estudantado da Facultade de Ciencias Económicas e Empresariais e de Ciencias Xurídicas e do Traballo, no Salón de Graos da Facultade de Ciencias Xurídicas e do Traballo, ás 12:30 horas

- 22 de febreiro de 2010:

Para o estudantado das Facultades de Química, Bioloxía e Ciencias do Mar. No Salón de Actos da Facultade de Ciencias Experimentais, ás 09:30 horas

Para o estudantado da Facultade de Filoloxía e Tradución, no Campus de Vigo. No Salón de Actos, ás 12:00 horas.

- 23 de febreiro de 2010:

Para o estudantado do Campus de Ourense. No Salón de Actos. Edificio Politécnico, ás 12:30 horas.

7.- Prazo e lugar de presentación de solicitudes

O prazo de presentación de solicitudes comezará o día seguinte ao da publicación desta Resolución no taboleiro da Universidade de Vigo e rematará ao 26 de febreiro de 2010.

A solicitude e xunto coa documentación requirida presentaranse en calquera dos rexistros da Universidade de Vigo ou por calquera outro medio previsto no artigo 38.4 da Lei 30/92, de 26 de novembro, modificada pola

Lei 4/99 do 13 de xaneiro, de réxime xurídico das administracións públicas e do procedemento administrativo común.

7.-Tramitación

A ORI enviará aos/ás responsables de relacións internacionais dos centros respectivos as solicitudes presentadas para que en cada centro se efectúe a selección dos/as bolseiros/as segundo os criterios establecidos por cada centro.

A selección dos/as estudantes realizarase nos centros, polas comisións establecidas a este efecto e será notificada á ORI.

9.- Resolución e notificación

En cada centro publicarase unha relación provisional de bolseiros/as seleccionados/as e concederase un período de reclamación de 10 días.

Os/As responsables de relacións internacionais dos centros remitirán á ORI as listaxes completas dos/as estudantes seleccionados/as (nome e apelidos, DNI, destino adxudicado e duración da estadía).

O Vicerreitor de Relacións Institucionais, á vista da proposta feita pola ORI fará pública unha resolución motivada co nome dos/as seleccionados/as e dos/as suplentes, podendo ser recorrida esta perante do mesmo órgano que ditou a resolución.

10.- Obrigas dos/as seleccionados/as

10.1. Os/as seleccionados/as deberán manifestar a súa aceptación ou renuncia por escrito na ORI nun prazo de dous meses.

Os destinos vacantes seranlles adxudicados directamente aos/ás suplentes sen que se produzan modificacións nas prazas xa asignadas e aceptadas polo/ass solicitantes seleccionados/as.

10.2. Os/As bolseiros/as realizarán os trámites de matrícula correspondentes na Universidade de Vigo, estando exentos do pagamento de taxas na universidade de destino.

10.3. Os/As seleccionados/as deberán entregar na ORI a documentación requirida para xustificar a duración da súa estadía:

- Ficha de datos do/a estudante.
- Contrato financeiro entre a Universidade de Vigo e o/a bolseiro/a
- Ficha de perceptores de pagos da Universidade de Vigo
- Certificado de chegada e de finalización da estadía
- Aviso de recibimento das axudas
- Enquisa de avaliación
- Autorización de uso de datos (voluntario)

A ORI entregará aos/ás seleccionados/as a ficha de datos do/a estudante, o contrato financeiro e o acuse de recibimento das axudas. O resto da documentación atopase na páxina web da Oficina de Relacións Internacionais (<http://www.uvigo.es/ori>)

11.- Revogación

No caso de que non se leve a cabo a estadia ou parte dela, sen causa xustificada, ou non se entregue a documentación solicitada, o/a bolseiro/a deberá devolver a contía íntegra ou parcial da bolsa. A Universidade de Vigo reservarase o dereito a reclamar o importe da axuda, polo incumprimento das bases desta norma.

A concesión da bolsa Erasmus queda pendente de aprobación da Unión Europea das prazas de mobilidade de estudantes solicitadas pola Universidade de Vigo para o curso 2010-11 e da aceptación na universidade de destino do/a estudante.

Contra esta Resolución, que esgota a vía administrativa, poderá interpoñer recurso ante a xurisdición contencioso-administrativa, no prazo de dous meses contados desde o día seguinte á súa publicación de conformidade co disposto na Lei 29/1998, do 13 de xullo, reguladora da xurisdición contencioso-administrativa.

Así e todo, o interesado poderá optar por interpoñer conta esta resolución recurso de reposición, no prazo dun mes contado a partir do día seguinte á publicación da presente resolución, perante o mesmo órgano que a dictou. Neste caso non caberá a interposición do recurso contencioso-administrativo antes citado, namentres non recaia resolución expresa ou presunta do recurso de reposición, de acordo co disposto na Lei 4/1999, do 13 de xaneiro, modificadora da Lei 30/1992, do 26 de novembro, de réxime xurídico das administracións públicas e do procedemento administrativo común.

O REITOR

Por Delegación (R.R. do 11/07/2006)
O vicerreitor de Relacións Institucionais

Iván C. Arez Carracedo

DILIXENCIA para facer constar que esta Resolución publícase con esta data no taboleiro desta Universidade.
Vigo, 8 de febreiro de 2010

O secretario do vicerreitor de Relacións Institucionais
Henrique Macías Cábrega